



## CUMÜN DA LAVIN

### Reglamaint per far adöver da vias champestras e da god cun veiculs a motor.

As basond sün art.15 da la ledscha forestala (LF) federala, sün art. 20 da la LF dal chantun e sün art.16 ordinaziun forestala (OF) dal chantun approvà da la radunanza cumünala als: 15 avrigl 1997 e reviss (art.3) da la radunanza cumünala dals 24 da gün 1997 e dals 11 december 2007.

#### Art. 1 Vias champestras e da god

Las vias champestras e da god dal cumün da Lavin servan:

- in prüma lingia a l'economia agricula, forestala ed alpestra,
- in seguonda lingia als bsögns turistics ( peduns, velos, passlung, ed oter plü)
- ed in terza lingia sco vias d'access a beamaints da vacanzas, per chomps cun tendas e per servezzans d'apport.

Sco vias champestras e da god valan seguaintas vias cun lur vias lateralas:

		categoria da vias
Nr. 1	Via da Gonda	2
Nr. 2	Via da Fulun - Surauas	2
Nr. 3	Via da Crusch - Nusch	2
Nr. 4	Via da Pragliver	1
Nr. 5	Via da Tanterauas	1
Nr. 6	Via da Valplan	1
Nr. 7	Via da Pranun	1
Nr. 7a	Via da Plan Sauaidas - Prasüras da Susch	2
Nr. 8	Via da Planturen	1
Nr. 9	Via da Missain	3
Nr. 10	Via da Laret	1

Per circular sün quistas vias cun veiculs a motor voula ün permiss

#### Art.2 Permiss per veiculs a motor

I dà:

- permiss generals chi valan tuot l'on e per tuot las vias e chi vegnan emiss per bsögns da l'economia agricula, forestala ed alpestra per pratichar lur actività profesiunala.
- permiss limitats chi valan per üna dürada limitada e per tragets e/o scopos circumscriets e chi vegnan emiss per servezzans d'apport.

Veiculs a motor cun ün permiss da tuot on vegnan marcats cun üna vignetta chi sto gnir fixada bain visibelmaing vi d'üna fnestra dal veicul. La vignetta nun es transmissibla ed es valabla be pel veicul ch'ella es emissa.

Il permiss da dürada limitada vegn emiss sün ün fögl chi descriva il traget, il temp ed il scopo dals transports admüss. Quist permiss nun es transmissibel e vala be pel veicul cul nomer chi d'es manzunà sül permiss. Il permiss sto gnir piazzà bain visibelmaing aint il veicul.

Ils permiss vegnan emiss da la cancellaria cumünala.

Ils permiss annuals valan adüna fin la fin dad avrigl da l'on seguaint. Scha la cancellaria nun ha amo scumparti automaticamaing ils permiss fin la fin d'avrigl ston quels gnir retrats persunalmaing ed a temp ütil. Pella cancellaria nun exista ingün oblig da trametter automaticamaing ils permiss.

### Art. 3 Restricziuns generalas

Veiculs chi pon circular süllas vias champestras e forestalas nu das-chan surpassar ils seguaints limits: categoria da vias:	1	2	3
limits da pais / largezza:	24 t. / 2.3m	16t. / 2.3m	via da Jeep e tractor

Excepziunalmaing e cun permiss dal schef da vias das-cha gnir trafichà cun 28t/2.50m. Il magistrat ha da gnir orientà davart tals permiss excepziunals. Sün tuot la rait da vias vala üna sveltezza maximala per veiculs a motor da 30 km/ura.

### Art. 4 Excepziuns sainza permiss

Per viadis cun seguaints scopos nu faja dabsögn d'ün permiss:

- per tuot ils viadis da servezzan da pulizia, forestal e per guardgias da sulvaschina;
- per viadis da meidis, veterinaris ed inseminaduors in actività professiunala;
- per viadis chi vegnan ordinats d'ün post cumpetent in occasiun d'accidaints, d'incendis e da catastrofes;
- viadis pel transport da sulvaschina d'ungla sfessa sajettata;
- per ir a far ed a manar laina cumprada e romma, sül traiget necessari. Ils permiss per ir a far laina cumprada e romma vegnan emiss dal silvicultur cun l'indicaziun dal traiget necessari e dal temp.
- per ütilisar ils gods privats;

### Art. 5 Permiss limitats

Permiss limitats vegnan emiss sün dumonda impustüt per seguaints scopos:

- per garantir l'access a stabels e beamaints per proprietaris e fittadins da tals;
- per pussibilitar servezzans d'apport a furnituors, a glieud da professiun, ad usters da chamonnas, a concessiunaris eui. da praticar lur actività professiunala;
- per far visitas a la pastriglia, a possessuors o fittadins da chamonnas e/o per güdar pro lavuors agriculas o da god;
- per transportar a personas chi sun impedidas da chaminar;
- per executar lavuors da servezzan in connex cul tir a schai bgias e'l runal.
- viadis in connex culla chatscha da reducziun tenor las disposiziuns chantunals da l'inspectorat da chatscha.
- per exercizis organisats da societats da chans da nüz;

In in cas specials decida il magistrat schi dess gnir concess ün permiss.

### Art. 6 Taxas

Las taxas pels permiss sun regladas in l'uorden da remuneraziuns e da taxas dal cumün da Lavin.

In cas motivats po il magistrat dar ün permiss gratuit.

## Art. 7 Mantegniment da las vias

Il mantegniment da las vias es chosa dal cumün.

Il schef da vias es respunsabel per la surveglianza da las lavuors da mantegniment da las vias champestras e da god.

Tuots quels chi circuleschan süllas vias champestras e da god sun obliats da schaniar las vias plü pussibel e pon gnir fats respunsabels per eventuals dons.

## Art. 8 Prescripziuns specialas

Il magistrat po scumandar tuot ils viadis in cas da relaziuns disfavuraivlas da las vias o relaschar restricziuns per ün tschert temp e/o per tschertas categorias da veiculs.

Barieras sun da serrar davo mincha passagi.

Dal territori cunfinant a las vias nu das-cha gnir fat adöver cun veiculs.

Parcar e cruschar das-cha succeder be in lös previs ed adattats per quai.

## Art.9 Disposiziuns penalas

Surpassamaints da quist reglamaint vegnan chastiat dal magistrat cun üna multa fin a fr. 200.—, in cas da repetiziun fin a fr. 1'000.—.

L'abüs dal permiss po avair sco consequenza la privaziun permanenta o temporala da tal.

## Art. 10 Execuziun

L'execuziun da quist reglamaint es chosa dal magistrat. El po delegar dovairs da surveglianza a funcziunaris cumünals.

## Art. 11 Publicaziun e signalisaziun

Las restricziuns da trafic chi sun gnüdas relaschadas cun quist reglamaint, sun da publicar. La signalisaziun ha da succeder in perincletta culla pulizia da trafic chantunala. La singnalisaziun pel adöver turistic suotastà al magistrat po pero gnir delegiada a la società da trafic.

## Art. 12 Entrar in vigur

Quist reglamaint rimplazza ils artichels 13 fin 17 punct II *Vias champestras* da l'uorden champester dal cumün da Lavin, dals 26 avrigl 1977.

El aintra in vigur davo cha'ls signals da prescripziun sun gnüts approvats tras il departamaint da güstizia, pulizia e sanità e davo cha la signalisaziun correspondentia es gnüda piazzada al lö (art.13 al.2 da l'ordinaziun executiva dal Grand Cussagl, OEGC, pro la ledscha federala da trafic sün via, LTV).

Approvà da la radunanza cumünala dals:	15-04-1997
Revis da la radunanza cumünala dals:	24-06-1997
Revis da la radunanza cumünala dals:	11-12-2007

Il cuvi:

  
Rico Bonifazi



l'actuar

  
Robert Cantieni

## Taxas

Taxa da cancellaria per permiss:

per ün on	auto	<b>frs. 80.00</b>
	töf ≤ 125ccm	<b>frs. 50.00</b>
per 4 eivnas		<b>frs. 40.00</b>
per 3 eivnas		<b>frs. 30.00</b>
per 2 eivnas		<b>frs. 20.00</b>
per 1 di		<b>frs. 15.00</b>

7543 Lavin, ils 30-04-1997